

平
津
讀
碑
記

讀碑記三續卷上

臨海洪頤煊

秦 漢

泰山刻石

右泰山刻石宋大觀中劉跂親至山頂拓得二百二十
三字爲泰山篆譜明北平許□僅得廿九字乾隆初年
燬於火近蔣伯生大令宰泰安於廢池中剔得殘石二
片僅存十字以一本贈予今絳帖中有劉譜摹本其闕
處予以史記原文補之字數恰合因命兒子瞻墉依廿
九字重摹足本刻置家塾亦快事也

嶧山刻石

右嶧山刻石在紹興府學元至正開東平申屠駟旣刻
會稽碑卽以嶧山碑刻於碑陰會稽碑康熙閒爲石工
磨去重刻他文而嶧山碑尙存此碑從鄭文寶本翻摹
故筆法與長安本無異唯行數不同字形略小二分楊
東里續集陳思孝論嶧山翻本次第長安第一紹興第
二其爲時推重如此

揚董造翁刻石

地節元年正月

右揚董造翁刻石近時新出於四川巴縣文云地節元
年正月巴州民揚董買山直錢千百作叢翁子孫永保
其多福造翁刻石蓋漢時風尙如此隸續有眞道翁地
碑寶刻叢編云在萬州卽漢巴郡地漢書地理志有巴

郡此稱巴州民亦土俗之通稱爾

魏

孫二娘王五娘等題名 黃初元年三月

右孫二娘王五娘等題名諸家皆未著錄余得汪氏所藏舊裝本錄之其文一云黃初元年三月十九日孫二娘李三娘李十三娘陳九娘衛十五娘衛十娘吳口娘爲口母造一云黃初元年三月廿六日王五娘張十二娘馮九娘馮六娘李十三娘朱五娘馬十二娘爲父造隸書皆有界畫末行字間有至正十八年題字魏志文帝嗣位改建安二十五年爲延康元年冬十一月庚午受禪改延康爲黃初此始事在三月刻石在十一月以

後故稱黃初元年

郃陽殘碑 黃初五年

右郃陽殘碑在郃陽縣康氏余近得三石其字皆隸書一石三行十三字次行有黃初五三字衆因定爲魏碑一石四行亦十三字首行有稚弟故三字諦視其筆法界畫與上石同二石當合爲一碑又一石二行止我君口授遐年美七字無界畫筆法亦異當別是一碑

吳

禹陵窆石遺字

右禹陵窆石遺字在會稽縣禹陵廟中嘉泰會稽志禹廟窆石遺字王順伯復齋金石錄定爲漢刻寰宇訪碑

錄兩浙金石志皆據太平寰宇記會稽縣引輿地記云
禹廟側有石船長一丈云禹所乘也孫皓刻其背以述
功焉後人以皓無功可記乃覆船刻它字其船中折以
此爲三國孫氏所刻原石止存三行僅辨九字

宋

寧州刺史爨龍顏碑

大明二年九月

右寧州刺史爨龍顏碑在雲南陸涼州阮賜卿公子搆
以見贈賜卿有跋極詳在小琅嬛叢記碑稱君諱龍顏
字仕德建寧同樂人迺祖肅魏尙書僕射河南尹宋書
州郡志建寧太守漢益州郡滇王國同樂令晉武帝立
屬建寧元和姓纂後漢河南尹爨肅見謝承後漢書蜀

志交趾刺史爨琛建寧大姓也皆與碑合碑稱祖晉寧
建寧二郡太守龍驤將軍寧州刺史考龍驤輔國將軍
入郡監軍晉寧建寧二郡太守追諡寧州刺史卬都縣
侯皆不言其名州郡志寧州刺史晉武帝太始七年立
建寧晉寧二郡皆屬寧州碑稱龍顏舉義熙十年秀才
除郎中相征西鎮遷南蠻府行叅軍試守建寧太守歸
闕除散騎侍郎龍驤將軍試守晉寧太守遷護鎮蠻校
尉寧州刺史卬都縣侯享年六十一歲在丙戌十二月
上旬薨丙戌是宋元嘉二十三年宋書文帝紀元嘉十
八年十二月晉寧太守爨松子反叛寧州刺史徐循討
平之松子當是其族屬碑稱歲在壬申百六邁廬州土

擾亂東西二境凶豎狼暴君收合精銳身伉矢石肅清
邊囁事當在元嘉九年或碑據起事之日史稱討平之
年故前後不同龍顏所授寧州刺史建寧晉寧二郡太
守皆當是其土官故爨氏祖父世襲爲之

南齊

妙相寺造像題字 永明六年

右妙相寺造像題字在會稽縣妙相寺文云齊永明六
年太歲戊辰於吳郡敬造維衛尊佛元和郡縣志後漢
順帝時分浙江以西爲吳郡以東爲會稽郡南齊書州
郡志會稽郡吳郡未嘗改併此在會稽不得言吳郡嘉
泰會稽志妙相寺下云晉天福中僧行欽於廢寺前水

中得石佛高財二尺餘背有銘云云凡十八字會稽未嘗號吳郡此石佛既得之水中又一人可負之而趨安知非吳郡所造而遷徙在會稽耶斯言蓋得之

梁

瘞鶴銘

右瘞鶴銘明人重摹本下載後人已剗去刻詩其上在瘞鶴銘原石故址西百餘步諸家皆未著錄其字視原石稍板重第一行瘞鶴銘并序五字第二行華陽二字第三行鶴壽不知其紀六字第四行未遂吾翔寥五字第五行山之下仙家無六字第六行相此胎禽浮丘六字第七行唯髣髴事亦微六字第八行洪流前固重局

六字第九行眞侶瘞尔四字凡四十六字近人有以此本合眞本裝潢稱未出水以前舊本者不可不辨

後魏

鎮遠將軍鄭道忠墓誌銘

正光三年十二月

右鎮遠將軍鄭道忠墓誌銘諸家皆未著錄誌稱君諱道忠字周子熒陽閼封人魏將作大匠渾之十世孫渾三國志有傳誌稱祖以清靜爲治化洽枌榆考以德禮鑄民慶畱海曲皆不言其名後魏書鄭義傳義熒陽閼封人魏將作大匠渾之八世孫義五兄長白驎次小白次洞林次叔夜次連山叔夜子伯夏司徒諮議東萊太守卒贈青州刺史子忠字周子右軍將軍鎮遠將軍卒

贈平東將軍徐州刺史誌作道忠祖叔夜未授官故云
化洽枌榆考伯夏東萊太守故云慶畱海曲皆與史合
誌稱君始爲高陽王國常侍轉衛尉丞加明威將軍從
步兵校尉遷鎮遠將軍後軍將軍以正光三年十月十
七日卒於洛陽之安豐里宅十二月廿六日窆於熒陽
山嘯石澗北不言所贈之官當在其既葬以後

法義一百餘人造像記

孝昌三年七月

右法義一百餘人造像記在厯城縣千佛山文云法義
兄弟一百餘人各捨家財於厯山之陰敬造石窟彫刊
靈像元和郡縣志齊州厯城縣古厯下城對厯山之下
太平寰宇記厯山在縣南五里

王僧啟造像記

建義元年五月

右王僧啟造像記在厯城縣千佛山文云維大魏建義元年五月口日清信士口弟子雍州長安人王僧啟敬造尊像一軀魏書莊帝紀武泰元年四月戊戌卽帝位辛丑改武泰爲建義元年九月乙亥改爲永安元年

張僧安造像記

天平四年閏九月

右張僧安造像記文云大魏天平四年歲次丁巳閏九月癸亥朔十九日辛樂縣人張僧安敬造石像一軀魏書孝靜紀天平四年九月閏月乙丑與此合辛樂卽新樂地形志屬樂陵郡

魏郡丞姚敬遵造像記

元象二年三月

右魏郡丞姚敬遵造像記在厯城縣前稱大魏元象二年歲次己未三月廿六日假伏波將軍魏郡丞姚敬遵敬造彌勒像一軀是年十一月改元興和此在未改元以前故稱元象二年官氏志郡丞第六品伏波將軍第五品階

清信女趙勝習造像記

興和二年九月

右清信女趙勝習造像記在厯城縣千佛山文云興和二年九月十七日清信女趙勝習十二人敬造彌勒石像三軀

邑義九十人造像記

武定元年口月

右邑義九十人造像記在河內縣碑中層刻造像記末

有大魏武定元年歲次癸亥字可辨上層刻畫佛經故事兩旁并下層俱刻佛像每旁俱有邑子某侍佛題名假作傲標作擲宋作宋微作傲海作海靈作靈休作休皆異文

邑主造石像碑

武定六年九月

右邑主造石像碑在偃師縣邑主下皆空八字蓋畱以刻其名也碑夷作夷靈作靈哉作哉算作算鼓作鼓皆異文磬茲惡果庶免鼎鑊惡字未詳

北齊

薛匡生造像記

武平元年

右薛匡生造像記在濟寧州鐵塔寺記僅高寸餘文云

武平元年薛匡生爲□□亡兄薛仕儻亡女佛暉願造
□□薛字皆作薛與字原平與令薛君碑同

邑義三百人造像記

武平二年七月

右邑義三百人造像記在河內縣文云有永顯寺法師
以武平二年歲次辛卯七月中師邑義三百人在太行
山大窮谷上寺之中敬造石□像一軀元和郡縣志太
行山在河內縣北二十五里師古率字通用

楊安都五十人造像記

武平七年四月

右楊安都五十人造像記在偃師縣上層刻造像記文
末題武平七年歲次丙申四月十五日建下層刻都邑
主楊安都等題名文云昔波斯慕聖以鈇靈容玉篇鈇

器也此借作鐙字

隋

諸葛子恆一百人等造像碑

開皇十三年四月

右諸葛子恆一百人等造像碑在沂州府城隋書高祖紀開皇八年十月命晉王口秦王俊清河公楊素並爲行軍元帥以伐陳九年正月景子入建鄴獲陳主叔寶碑稱皇帝遣行軍元帥晉口問罪弔民以開皇九年正月口口軍次於江左皆與史合碑多異文敢筭万乖之師抗作衆獻曹制之說左氏傳作曹劌公羊傳作曹昧盭狄彌之武盭卽奮字狄彌卽左氏傳提彌明公羊傳作祁彌史記趙世家作示昧皆同聲假借字歌狄杜而

勞其口顏氏家訓書證篇詩云有秋之杜江南本並木
旁施大而河北本皆爲夷狄之狄此又作狄與河北本
異餘如囂作壘旅作依置作豎聖作望葦作蕒鹽作陸
矢作笈崇作崇皆異文

唐高祖造像記 大業二年正月

右唐高祖造像記在鄆縣草堂寺文云鄭州刺史李淵
爲男世民因患先於此寺求仙蒙仙恩力其患得損今
爲男敬造石碑像一鋪云云末題大業二年正月金石
萃編載有二碑一卽此碑題作唐高祖爲子祈疾疏一
碑云鄭州刺史男李世民遇染時患比聞大海寺有雙
王像治病有驗故就寺禮拜其患乃除口於此寺願造

石彌勒像一鋪云云末題大業元年□□□舊唐書張仲方傳熒陽大海佛寺有高祖爲隋鄭州刺史日爲太宗疾祈福於此寺造石像一軀凡刊勒十六字以誌之不言有碑寶刻叢編鄭州下引訪碑錄云隋鄭州刺史李淵造石像記大業二年三月造又引金石錄云唐高祖造像記大業二年三月未知是一碑抑是二碑今鄆縣草堂寺造像記又題大業二年正月宋人皆未見著錄大約高祖諸造像記多是後代寺僧爲之故所載年月舛錯不同

唐

唐太宗書屏風碑

右唐太宗書屏風碑在餘杭縣治末有淳熙九年十一
祝寬夫跋稱唐會要正觀十四年四月二十二日上爲
真草書屏風以示羣臣真書者不復見而草書僅存止
此嘉泰甲子十月王允初刻石於餘杭縣延祐丙辰春
縣尹王昌復遷立於縣廳

幽州都督牛秀碑

年月泐

右幽州都督牛秀碑在醴泉縣碑殘泐唯上截前七八
行存碑首結銜稱大唐故左驍衛大將軍幽州都督上
柱國琅琊郡開國公牛公碑銘公諱秀字進達其先隴
西狄道人也因官而遷于濮曾祖定後魏韓口口父漢
隋濮州主簿洛州清漳縣令餘俱不可辨長安志昭陵

陪葬功臣有武衛大將軍牛進達兩唐書無傳新唐書
西域高昌傳乃拜侯君集爲交河道大總管左屯衛大
將軍薛萬均薩孤吳仁副之契苾何力爲蔥山道副大
總管武衛將軍牛進達爲行軍總管率突厥契苾騎數
萬討之姜行本紀功碑左側有交河道行軍總管左武
衛將軍上柱國□□縣開國公牛進達領兵十五萬題
名蓋秀本以字行也

申文獻公高士廉塋兆記

高宗初

右申文獻公高士廉塋兆記在醴泉縣昭陵碑前題高
陽縣開國公許敬宗撰□□府錄事參軍趙模書模卽
貞觀中太宗命臨蘭亭序者碑云以貞觀廿一年正□

五日薨於正寢卽以其年二月廿□□□於九嶷山之南趾墓而不墳又云配享太宗廟庭蓋葬時其家未嘗立碑此碑當立於太宗薨後高宗卽位初年舊唐書高士廉傳子履行尙太宗女東陽公主遭父艱居喪以孝聞太宗手詔敦喻曰古人立孝毀不滅身聞卿絕粒殊乖大體幸抑摧裂之情割傷生之累碑末稱遽迫晏駕之口小履口面承恩旨淪肌刻骨正與史同

金城村造石碑像記

麟德元年九月

右金城村造石碑像記在河內縣文云以麟德□□歲次甲子去九月辛丑朔廿日庚申合村等云云敬造石碑像一區金城之所置也文廿六行行十七字

清河公主碑

麟德元年十月

右清河公主碑在醴泉縣碑上截已斷闕前後年月俱
摩泐金石錄清河公主碑李儼撰暢整正書麟德元年
十月今碑前題口州長安縣品子暢整書字猶可辨唐
制凡國子學生皆以有官品者之子若孫爲之百官志
方其盛時著於令者納課品子萬人卽其證新唐書公
主列傳太宗女清河公主名敬字德賢下嫁程懷亮薨
麟德時陪葬昭陵懷亮知節子也終寧遠將軍金石錄
碑云下嫁程知節之子處亮知節碑及唐史知節列傳
元和姓纂所載皆同惟公主列傳作懷亮非是今碑處
亮之名已闕其稱瀛州刺史婁之孫岐州刺史下稱封

東阿縣開國公食邑一千戶兩唐書知節列傳皆不載此碑近時收藏家皆未著錄雍州金石記清河公主碑僅存形似余藏本所存五百餘字皆清晰蓋舊時拓本洵可寶也

功曹叅軍梁夫人成氏墓誌

麟德元年十二月

右功曹叅軍梁夫人成氏墓誌在長安縣誌稱曾祖璫隨任濟州東阿縣長祖貴唐任幽州永壽縣令而不稱父夫人以麟德元年十二月三日卒於隆政里第卽以其月十一日殯於終南山榿梓谷之阿長安志布政坊本名隆政避明皇名改王居士塼塔銘起靈塔於終南山榿梓谷長安志榿梓谷水出南山南山一名終南山

在縣南七十里

張開疆造像記 乾封二年九月

右張開疆造像記在假師縣凡二石其一稱大唐乾封二年九月三日佛弟子張開疆尹氏女爲父母敬造阿彌陀像一區其一稱佛弟子張開疆供養妻蘇供養女苟兒男智達男智興女夫尹仁則俱刻在佛座下

張對墓志 乾封三年正月

右張對墓志稱對字懷玉南陽白水人祖貴朝散大夫父素身有勳官君殞以乾封三年歲次戊辰正月十七日辛丑春秋一十有七私作和粵作粵皆異文

道安禪師塔記 總章三年二月

右道安禪師塔記在西安府百塔寺記稱禪師姓張以
總章元年十月七日遷形於趙景公寺禪院以三年二
月十五日起塔於終南山鷄鳴埕信行禪師塔後長安
志常樂坊西南隅趙景公寺隋開皇三年獨孤皇后爲
父趙景武公獨孤信所立興教院在長安縣南六十里
槐梓谷口本百塔信行禪師塔院

李義豐造像記

咸亨元年十二月

右李義豐造像記在偃師縣文云咸亨元年十二月廿
二日佛弟子李義豐爲皇帝陛下法界衆生合家大小
先祖墳靈亡父亡叔見存母敬造彌勒像一區說文豐
字經典相承作豐

韓寶才墓誌

咸亨四年十二月

右韓寶才墓誌在長安縣誌稱以咸亨四年歲次己酉十月朔廿九日卒於京城懷德之第以其年十二月九日殯於京城西布政之原小巖村之左長安志懷德坊在皇城西第三街布政坊在皇城西第一街誌唐作唐異文

阿彌陀像文

上元二年十二月

右阿彌陀像文末題大唐上元二年十二月八日刊記唐有兩上元文稱奉爲天皇天后則高宗時立也

李万通造像記

儀鳳三年七月

右李万通造像記在河內縣文云大唐儀鳳三年歲在

三
一
戊寅七月乙卯朔戊寅作咸寅卯作卯皆俗字又云上
爲天皇后新唐書高宗紀上元元年八月壬辰皇帝
稱天皇皇后稱天后其時高宗尙存

王畱墓誌銘

儀鳳四年五月

右王畱墓誌銘首行題王君諱畱字畱生墓誌銘次行
稱君諱畱生太原喬之裔也蓋唐人小墓誌多鄉里俗
儒所爲題稱無一例也去咸亨五年正月廿五日卒於
里第權窆於劉村西以地多磐石下涌清泉改墳於伊
楊村西一里與夫人張氏合葬

順陵殘碑

長安二年正月

右順陵殘碑在咸陽縣前僅得其一石茲復得二石長

安志順陵在咸陽縣東北卅里唐武后追尊其母曰孝
明皇后號曰順陵金石錄周孝明皇后碑武三思撰相
王旦書長安二年六月卽此碑金石文字記作正月碑
尙存孝明二字

杜夫人墓誌

長安三年十月

右杜夫人墓誌在長安縣誌稱曾祖勣在監門將軍善
寶唐口州口縣令父嘉猷唐務州參軍善寶上脫祖字
務州當是婺州之譌誌前題銜稱故司稼寺卿上柱國
口口口杜夫至誌中不稱其夫名氏竟不知爲何人舊
唐書職官志司農寺卿從三品龍朔二年改爲司稼咸
亨復此題司稼寺卿其歷官當在咸亨以前

千佛像碑并陰兩側

無年月

右千佛像碑在扶風縣法門寺碑正面刻千佛像碑陰刻涅槃經碑側南无師子仏一心敬禮者卻六十万劫生死重罪南无師子仏一心敬禮者卻三萬六百劫生死之罪似是明人功過格之所自始碑無年月題記今依關中金石志附於武后之末

思遠禪師殘誌

無年月

右思遠禪師殘誌首行有大周廣慈禪院六字次行有節度常三字當是撰書人結銜

恆州司馬殘墓誌

景龍三年七月

右恆州司馬殘墓誌上截已斷姓名不可考貞觀年授

杭州錄事參軍口隆二年除恆州司馬口口口六月
七日卒春秋六十五夫人華陰郡君楊氏口歲通天二
年正月五日春秋二十六卒以景龍三年七月十九日
合葬於長安縣西龍首原末行題陝縣尉河東柳紹先
撰荆府法曹隴西李爲仁書誌稱口口口讓帝平恩
貴戚敝丹第而封侯奕葉承家淪瀾浸遠司馬當是許
姓

行兗州都督獨孤仁政碑 景雲二年二月

右行兗州都督獨孤仁政碑在孟縣仁政兩唐書無傳
碑稱高祖永業齊行臺左僕射彭城郡公兼吏部尙書
周大司寇曾祖子佳周武安郡公涇州刺史祖義恭隋

富平縣令唐婺州刺史高平縣開國侯父士贊坊州郿城縣令新唐書宰相世系表永業生子佳子佳生義恭士贊以下皆不書碑稱仁政解褐思州司倉參軍改授宣州溧陽縣丞轉朝議郎上護軍行兗州都督方與縣令以景龍二年三月廿九日卒於河內郡之私第春秋七十有七以景雲二年歲次辛亥二月景子朔廿七日壬寅遷窆于洛州河陽西北韓城鄉龍臺里之平原碑敘高祖永業以下結銜甚詳皆可補史表之闕

將軍柱國史公石像銘

延和元年十月

右將軍柱國史公石像銘此造像銘而文內不言史公名金石萃編年月後有夫人襄邑縣口口氏建一行此

拓本失之

少林寺戒壇銘

開元三年五月

右少林寺戒壇銘在登封縣趙明誠金石錄唐少林寺戒壇銘三藏法師義淨撰張傑入分書開元三年正月明都穆金薤琳瑯載少林寺戒壇銘與趙氏本同末題南館學生張傑書此本銘與年月同題作括州刺史李邕書以兩唐書李邕傳考之開元三年邕貶括州司馬二十三年起爲括州刺史結銜與史不合當是後人僞造姑以相承旣久錄之

協律郎裴公妻賀蘭氏墓誌銘

開元四年十二月

右協律郎裴公妻賀蘭氏墓誌銘在長安縣誌稱綿聯

沈疴三浹其歲泊大漸移寢於濟法寺之方丈蓋攘衰也長安志濟法寺在布政坊攘古通作禳字攘衰是禳除其衰惡之氣蓋當時禮文如是殯於鴟鳴埽實陪信行禪師之塔信行禪師塔院見上道安禪師塔銘

兗州都督于知微碑

開元七年六月

右兗州都督于知微碑在三原縣碑稱祖志寧蒲岐華三州刺史于志寧碑作榮州刺史遷岐州刺史除華州兩唐書本傳俱作榮州與此碑異碑云以開元二年十一月十八日遷祔于京兆府三原縣萬壽鄉長拘原舊塋禮也長安志三原縣萬壽鄉在縣北于志寧碑葬于萬壽鄉清池里于大猷碑夫人李氏合葬于萬壽鄉長

拘之先塋俱與碑同

賢力毗伽公主阿那氏墓誌

開元十一年十月

右賢力毗伽公主阿那氏墓誌在長安縣誌稱漠北大國有三十姓可汗愛女建冊賢力毘伽公主入漢封雲中郡夫人父默啜大可汗國家喪亂蕃落分崩委命南奔歸誠北闕家珝犯法身入宮闈天恩載被禮秦晉於家兄家兄卽三十姓天上得毘伽煞可汗也特許歸親兄右賢王墨特勤私第以大唐開元十一年六月十一日薨於右賢王京師懷德坊之第懷德坊右賢王宅長安志不載誌前題駙馬都尉故特進兼左衛大將軍雲中郡開國公踏沒施達干阿史德覓覓

益州長史張敬忠奏狀

開元十三年正月

右益州長史張敬忠奏狀在灌縣青城山前開元十二年閏十二月勅稱蜀州清城先有常道觀所置元在青城山中聞有飛赴寺僧奪以爲寺州旣在卿節度檢校勿令相侵此乃其准勅處置訖之奏狀也碑末題開元十三年正月十七日左散騎尙侍益州大都督府長史劍南道節度大使攝御史中丞本道採訪經略大使上柱國張敬忠上表碑爲常道觀主甘榮書

行次成皐詩

開元十三年二月

右行次成皐詩在汜水縣文首題五言二字次空格題行次成皐途經先聖擒建德之所緬思功業感而賦詩

下有御製二字跳行有隨政昏虐羣雄口多爭先聖按
劍起叱吒風雲成飲馬河濟竭作氣嵩華驚克敵睿圖
就擒俘帝道亨徒慙嗣寶厯恭承天下平幸過翦勅地
咸慕神且英開元十三年十月十二日東封口前常州
口口縣尉史敘書新唐書高祖本紀武德四年五月壬
戌秦王世民敗竇建德於虎牢執之元和郡縣志開皇
十八年改成皐爲汜水縣等慈寺在縣東七里王師旣
破建德有詔於戰所起寺立碑玄宗本紀開元十三年
十月辛酉如兗州庚午次濮州十一月庚寅封于泰山
十月十三日在東封前題也寶刻叢編作唐明皇過汜
水詩金石錄作艾敘書是傳寫之譌

思恆律師誌文

開元十四年十二月

右思恆律師誌文在咸寧縣誌稱律師俗姓顧氏祖元
隨門下上儀同三司蔭蕪郡開國公隋書地理志無蔭
蕪郡唯漁陽郡無終縣後周廢徐無縣入焉郡或暫時
所置故志不書徐無作蔭蕪是俗字誌又稱初和帝代
召入內道場新唐書中宗本紀景龍四年六月壬午崩
諡曰孝和皇帝

尊勝陀羅尼經碑

開元十八年正月

右尊勝陀羅尼經碑在河內縣碑書佛頂尊勝陀羅尼
經一卷末有篆書年月一行月字日字皆繪作日月之
形爲他碑所未見

比丘尼堅行禪師塔銘

開元二十一年閏三月

右比丘尼堅行禪師塔銘在長安縣前題大唐宣化寺
故比丘尼長安志宣化尼寺在永平坊隋開皇五年立
文云豈茶晨霜易晞茶卽圖假借字

安國寺惠隱禪師塔銘

開元二十六年二月

右安國寺惠隱禪師塔銘在洛陽縣碑稱禪師俗姓榮
京兆人其家第四女蓋尼僧也曾祖權隨金紫光祿大
夫散騎常侍兵部尙書東阿郡開國公祖建緒銀青光
祿大夫使持節息始洪諸軍事三州刺史東阿郡開國
公父懷節夷州綏陽縣令隋書榮昆傳稱父權魏兵部
尙書不言東阿郡開國公昆兄建緒仕周爲載師下大

夫儀同三司與高祖有舊及爲丞相加位開府拜息州刺史開皇初歷始洪二州刺史皆與碑合碑敘祖下稱叔祖思九黃門侍郎父下稱外祖韋氏字孝基皇中書舍人逍遙公之孫爲他碑所未見

了緣和尚靈塔銘

開元二十六年七月

右了緣和尚靈塔銘在鄞縣題授鄞縣令王叔通撰并書文云開元廿六年歲戊寅七月旣望了緣禪師圓寂師蔣姓嘗游于吳會間乙卯遇於余毘陵年四十渡江而東見鄞雖濱海而山川頗幽邃遂結茆以終老焉余來鄞甫三月而遽得其耗元和郡縣志開元二十六年採訪使齊澣奏分越州之鄞縣置明州鄞縣本漢舊縣

大智禪師碑陰記

開元二十九年五月

右大智禪師碑陰記在西安府學大智禪師碑立於開元廿四年九月此題記在其後五年史惟則結銜前碑稱右羽林軍錄事叅軍此稱通直郎行河南府伊闕縣尉記前題河南少尹陽伯成撰寶刻叢編有唐萬回神迹碑陰記題陽伯成撰并贊史惟則八分書

元璟造五級石浮圖銘

開元

右元璟造五級石浮圖銘在濟源縣碑字多殘泐碑首有口浮圖銘并序五字下有廬江口泌撰可辨次行稱元憬其先隴西郡人也其姓已闕又有家聲載在史傳曾祖諱字敘述甚詳後刻佛經末有李元福趙子琦等

題名右有奉爲開元神武聖文皇帝及代先亡造石浮圖五級橫額七大字新唐書元宗本紀開元二十七年羣臣上尊號曰開元聖文神武皇帝天寶元年上尊號開元下加天寶二字此碑尙是開元時立

古文老子道德經

右古文老子道德經不知所在碑前後拓本俱闕僅自道法自然自然二字起至陸行不遇兕虎入軍三字止凡三十行行五十五字德經亦不標題每章俱空一格審其筆法俱與郭忠恕汗簡古文相同舊唐書司馬承禎傳開元十五年又召至都立宗令以三體寫老子經因刊正文句汗簡引有古老子此或其是歟因附於開

元之末

玄元靈應頌

天寶元年七月

右玄元靈應頌在整屋縣樓觀舊名宗聖觀玄元靈應見夢真容碑事在開元廿九年碑末題朝散大夫守倉部郎中上柱國戴璇撰序朝散大夫守戶部郎中劉同昇撰頌開府儀同三司尚書右僕射曾孫戴伋書序文中止稱戶部郎中沛國劉同升而不及璇元和姓纂有唐司勳員外郎戴璇同州刺史劉同昇洛陽人稱本白沛國徙焉

內侍張元忠夫人令狐氏墓誌銘

天寶十二載十二月

右內侍張元忠夫人令狐氏墓誌銘在長安縣誌稱天

寶十二載十一月四日夫人卒於京兆府殖業里之私第夫張公元忠任太中大夫賜邑爲鴈門郡君進銀青光祿大夫天寶九載五月十三日卒於河南府里今載二月四日遷殯於京兆府長安縣龍首鄉之原殖業里不見於長安志

優婆姨段常省塔銘

天寶十二載

右優婆姨段常省塔銘稱女劉三娘建尼僧稱優婆尼此稱優婆姨他碑所少

東方朔畫贊碑陰記

天寶十三載十二月

右東方朔畫贊碑陰記在陵縣文云真卿去歲拜此郡屬殿中侍御史平公列監蔡御史閻公寬李公史魚胄

曹宋公謩咸以河北探訪使東平王判官巡按狎至真卿候于境上東平王卽安祿山平列李史魚俱見祿山傳

雲麾將軍張安生墓誌銘

天寶十四載二月

右雲麾將軍張安生墓誌銘在長安縣誌稱景雲中屬韋氏竊權羣凶暴溢擾我黔庶殘我王室公乃叶忠謀爲佐弼再清京兆之天重捧長安之日遂解褐授果毅二遷折衝一拜郎將再轉中郎畢於龍武將軍銘曰臨難不懼兮忠臣節奉我明后誅暴孽鵠鵠貴兮雁行列花萼忽凋兮一枝缺公當有兄弟著聲於朝列也

讀碑記三續卷上終

讀碑記三續卷下

臨海洪頤煊

唐

謁金天王神祠題記

乾元元年十月

右謁金天王神祠題記在華陰縣文云皇唐乾元元年
歲次戊戌冬十月戊申眞卿自蒲州刺史蒙恩除饒州
刺史十有三日辛亥大理評事攝監察御史穆寧評事
張澹華陰令劉嵩主簿鄭鎮次於華陰與監察御史王
延昌同謁金天王之神祠舊唐書顏眞卿傳爲宰相所
忌出爲同州刺史轉蒲州刺史爲御史唐旻所構貶饒
州刺史不載其年據此記自蒲州貶饒州在乾元元年

十月穆寧傳初寧佐採訪使巡按常過平原與太守顏
真卿密揣祿山必叛真卿唱義舉郡兵奏署大理評事
河北採訪支使真卿弃郡夜渡河見肅宗於鳳翔發驛
召寧將以右職待也會真卿以抗直失旨事遂止此稱
大理評事猶是前所授官也因亮撰真卿行狀稱元宗
以公爲戶部侍郎依前平原太守又詔公爲河北採訪
處置使公又以前咸陽尉王延昌爲判官張澹爲支使
令狐峘撰真卿神道碑公加河北採訪招討使前殿中
侍御史沈震鹽山尉穆寧武邑尉李詵清河主簿張澹
清池尉賈載各抒器能叅贊戎務此記同謁之穆寧張
澹王延昌三人皆其舊時僚屬也

張惟一等祈雨記

乾元二年二月

右張惟一等祈雨記在華陰縣文稱乾元元年白十月
不雨至於明年春兩唐書本紀及五行志俱不載張惟
一見新唐書宰相世系表華州刺史與此合

華嶽第五琦題名

大厯五年六月

右華嶽第五琦題名在華陰縣文云前相國京兆第五
公自戶部侍郎出牧枯州子聿關內河東副元師判官
禮部郎中兼侍御史虞當自中都濟河於華陰拜見從
謁靈祠因紀貞石時大唐大厯五年六月四日新唐書
第五琦傳以乾元二年進同中書門下平章事貶忠州
長史寶應初起復以戶部侍郎兼京兆尹坐與魚朝恩

善貶枯州刺史題名爲其壻虞當所書故稱第五公元和郡縣志高祖置河東郡開元元年改爲河中府置中都

華嶽盧綸等題名 大厯六年二月

右華嶽盧綸等題名在華陰縣盧綸名在大厯十才子之列結銜稱將仕郎守閩鄉縣尉新唐書盧綸傳大厯初數舉進士不入第元載取綸文以進補閩鄉尉地理志閩鄉縣屬虢州弘農郡

盧朝徹謁嶽廟文 大厯九年三月

右盧朝徹謁嶽廟文在華陰縣文云撰擇元辰撰擇卽選擇吉蠲饋饌今詩作饌饌釋文饌又作饋說文引亦

作饋皆古義之厘存者

恆王府典軍王景秀墓誌銘 大厯十一年八月

右恆王府典軍王景秀墓誌銘在大興縣新唐書玄宗子恆王瑱好方士常服道服從帝幸蜀還代宗時薨夫
人鉅鑣魏氏鉅鹿本作鉅鑣詳見前豫州從事尹宙碑
得此又多一證

黃帝祠宇四字 無年月

右黃帝祠宇四字在縉雲縣黃帝祠宇四大篆字分作
二行行二字碑首有李陽冰三小篆字丹陽葛蒙勒石
六正字寶刻叢編引復齋碑錄稱仙都山黃帝祠堂碑
唐袁鵬撰雲遊子正書篆額咸通八年立此四字李陽

冰所篆當是別爲一碑王象之輿地碑目黃帝祠宇篆額唐李陽冰篆在仙都山卽此

隴右節度使李元諒功德頌

貞元五年十月

右隴右節度使李元諒功德頌在華州舊唐書李元諒傳本駱元光姓安氏其先安息人也少爲宦官駱奉先所養冒姓駱氏以功加御史中丞遷華州刺史兼御史大夫潼關防禦鎮國軍節度使尋加檢校工部尙書興元元年五月詔元諒與副元帥李晟進收京邑貞元三年詔元諒將本軍從渾瑊與吐蕃會盟於平涼帝念其勲勞賜姓李氏改名元諒四年春加隴右節度支使營田觀察洮臨軍使移鎮良原貞元五年十一月卒於良

原今本作貞元元年是傳刻譌也頌以貞元五年十月十五日建在其未卒前一月故新唐書本傳稱贈司空諡曰莊威碑皆不之及碑結銜稱武康郡王兩唐書本傳亦不載

下邳縣丞韋公王夫人墓誌銘

貞元六年二月

右下邳縣丞韋公王夫人墓誌銘在長安縣韋公名端已見前玄堂誌夫人以大厯十三年三月廿五日終于長安親仁里之私第四月遷殯萬年縣加川鄉西原貞元六年二月廿三日返葬洪固鄉韋之舊塋玄堂誌稱端以元和十四年三月廿三日棄背於長安新昌里私第貞元六年以五月一日祔於萬年縣洪固鄉畢原先

太夫人太原王氏之塋是後於此誌纔三月長安志親
仁坊在朱雀街東第三街新昌坊在朱雀街東第五街
洪固鄉在萬年縣南一十五里

贈工部尙書張維岳神道碑

貞元八年三月

右贈工部尙書張維岳神道碑在高陵縣碑前稱大厯
乙卯歲夏四月有星犯於北落秋九月癸巳大將軍維
岳薨於位冕旒悼悼惜贈工部尙書又稱世系隨齊州刺
史政之曾孫皇太子家令元濟之孫豐王府司馬贈靈
州大都督履仁之子兩唐書有張維岳附其父李寶臣
傳寶臣死軍中推爲畱後求襲父位爲王武俊所殺此
當別是一人碑稱安羯稱亂汾陽王郭公子儀偉其材

略引爲步將清渠之戰特拜左衛將軍遷右衛大將軍
乾元中汾陽蕩咸洛加通義大夫太僕卿封南陽縣男
僕固懷恩之授鉞也亦仗公以心腹今聖踐極進封南
陽郡公累加漢東郡王充朔方都知兵馬使公以三軍
無帥審於避嫌驛歸闕下拜左羽林將軍知軍事改封
文安郡王遷本軍大將軍錫以金券仍畫像於凌煙閣
新唐書僕固懷恩傳懷恩頓軍汾州使裨將李光逸守
祁李懷光拒晉州張惟岳據沁州舊唐書僕固懷恩傳
尙書右丞顏真卿曰懷恩將士皆子儀部曲恩信結其
心何不以子儀代之喻以逆順禍福必相率而歸子儀
至河中僕固瑒已爲朔方兵馬使張惟岳等四人斬其

首獻于闕下所言皆與碑合碑不言僕固瑒事蓋諱之也

東陵聖母帖

貞元九年四月

右東陵聖母帖不著撰書人姓名相傳以爲僧懷素書
太平寰宇記江都縣東陵聖母廟在縣南三十里神仙
傳云東陵聖母海陵人適杜氏師劉綱學仙術成道夫
不之信告官具以囹圄頃之聖母從獄窗中飛出衆人
望見之轉高入雲中於是立廟遠近敬信每表靈驗此
必廟中記文元祐戊辰摹於帖後有左拾遺裴休等大
和四年十月十二日同登題名不知何以附在此

華嶽裴潏等題名

貞元九年七月

右華嶽裴潏等題名在華陰縣裴潏兩唐書有傳前萬年縣尉裴堪世系表裴堪江西觀察使與此結銜不同

涿州司馬劉建墓誌銘

貞元十四年十二月

右涿州司馬劉建墓誌銘在大興縣誌稱府君諱建字建燕人也故順化州刺史兼侍御史諱瓌卽其先人府君伯季六人房居第二元兄諱逸次弟諱迅行幽府司戶參軍再厯檀州司馬次諱口厯職轅門駟雞五邑次諱口二宰大邑終於涿郡歸義縣季諱邁守檀州司法參軍皆具載於誌中新唐書地理志順化郡屬慶州

畢遊江墓誌銘

貞元十九年七月

右畢遊江墓誌銘近時出於太原白雀寺劉吉甫太守

所贈誌稱遊江平陽王彥之後世居太原豪族第一史傳無平陽王畢彥元和姓纂太原畢氏狀稱畢諶之後亦與此異遊江以貞元十九年六月十四日壽終於恆府敬愛坊之私第七月一日歸葬於府城西北七里冰河鄉之原

河南少尹裴復墓誌銘

元和三年四月

右河南少尹裴復墓誌銘新唐書宰相世系表裴氏元簡尉氏尉曠御史中丞虬諫議大夫復字茂紹河南少尹皆與誌合誌稱公舉賢良三遷至侍御史厯殿中侍御史累遷至刑部郎中改河南少尹誌侍作待厯作厯刑作形皆譌字何也怡亭銘裴虬撰已見前太平廣記

載蘇州戴顓宅天寶末河東裴虬常旅寄暴亡久之方寤一段

濟源枋口開渠修蘭若記

元和六年十一月

右濟源枋口開渠修蘭若記在濟源縣碑首行已摩滅記每段有注曰枋口記曰開渠記曰蘭若記其稱沁水出沁州沁口山初出泉涌口堪賞翫屈茲枋口實曰巨河水像枋形俗謂之枋口水經沁水注沁水又南出山過沁水縣北南出石門世謂之沁口石門是魏野王典農中郎將司馬孚之所造夾岸累石結以爲門用代木門枋故石門舊有枋口之稱所言皆與記合又稱有釋子堅公者懷濟物之心有開河之志分流一派溉數百

萬頃之田荷鋪興雲缺渠成雨黃泥五斗杭稻一石由
是河內之人無饑年之慮新唐書地理志濟源縣有枋
口堰大和五年節度使溫造浚古渠溉濟源河內溫武
陟田五千頃在此修渠之後蘭若在枋口內灣天成山
末云元和四年赤奮歲朔□□年單闕歲冬十一月記
是元和六年也下有濟源縣令李朝陽等銜名

殿中監石神福墓誌銘

元和八年二月

右殿中監石神福墓誌銘在石邑縣誌前結銜稱故成
德軍節度下左金吾衛大將軍試殿中監府君諱神福
字忠良金谷郡人也父何羅燭試雲麾將軍蔚州大總
管公生於雄武長在蔚州安史作亂漂泊恆陽尊父卑

上哀榮葬畢蓋神福本胡人而寄居在恆陽也新唐書地理志薊州有雄武軍金谷郡不見於史志當是邊郡所暫置者

徐偃王廟碑

元和九年十二月

右徐偃王廟碑在衢州碑僅存上截每行十三字寶刻叢編有此碑稱唐韓愈撰元錫書東雅堂韓昌黎集注引石刻稱朝議郎守尙書考功郎中知制誥昌黎韓愈撰福州刺史元錫書元和十年十二月九日立今碑前結銜唯朝議郎守尙書六字存以下俱闕寶刻叢編亦作元和十年十二月立今碑末稱元和九年十二月是後人重摹之譌

十哲贊

元和十年十二月

右十哲贊在紹興府學十哲顏回子淵閔損子騫言偃
子游端木賜子貢冉予子我冉雍仲弓冉求子有仲由
子路冉耕伯牛曾參子輿卜商子夏唐六典國子監凡
釋奠於先聖孔宣父以先師顏回配七十二弟子及先
儒二十二賢從祀焉舊令唯祀十哲及二十二賢開元
八年勅列會參於十哲之次故額題十哲贊而碑有十
一人也寶刻叢編此碑題作孔子弟子贊唐明皇源乾
曜盧從愿李抗元行冲張嘉貞宋璟陸餘慶姚元崇蘇
頲裴濯撰正書無名氏篆額元和十年十二月刺史孟
簡立訪碑錄題作元和十哲贊非也

元固等題名 元和十二年四月

右元固等題名在英德縣南山文云守殿中侍御史元固白龍川祖命西上過此巖元和十二年四月一日題後有元冀元昭肅元傑釋智捷四人題名元傑元昭肅智捷見開東嶺洞谷銘

安定郡王李光進碑 元和十五年

右安定郡王李光進碑在榆次縣令狐楚撰嗣子季元書碑無建立年月據碑光進以元和十年六月辛未卒於鎮十一年二月還葬太原府東四十里孝敬原十三年春弟光顏平淮西入朝請於天子得立碑於墓錢辛楣少詹以令狐楚結銜攷之知碑當立於元和十五年

也碑稱禮部尚書隴西公說待以心膂奏兼殿中侍御史工部尚書滎陽公僖杖爲爪牙表兼御史中丞新唐書宗室世系表河東節度使說字巖甫宰相世系表鄭僖檢校工部尚書河東節度使皆與碑合

贈太保李良臣碑

長慶二年

右贈太保李良臣碑在榆次縣良臣卽李光進光顏之父也其先河曲諸部姓阿跌氏貞觀中內屬以其地爲雞田州世襲刺史隸朔方軍元和四年光進檢校工部尚書爲振武軍節度使賜姓以光寵之宰相世系表稱爲雞田李氏良臣以寶應二年七月廿三日薨於河中口所以貞元十一年八月葬於太原府城東卅里孝敬

原碑立於汴宋平後當在長慶二年新唐書李光顏傳
不言賜姓事碑云憲宗章武皇帝以僕射司徒口在第
一賜姓李氏屬籍于宗正可與李光進傳互相證

泉州刺史烏重儒題名

寶曆二年六月

右泉州刺史烏重儒題名在錢唐縣龍泓洞文云泉州
刺史烏重儒寶曆二年六月十八日赴任過游此寺新
唐書宰相世系表烏氏有重胤重元而無重儒當是其
疎遠也

登封縣令崔蕃墓誌銘

大和七年十一月

右登封縣令崔蕃墓誌銘在長安縣誌稱公諱蕃字師
陳魏郡博陵人大王父玄隱皇朝比部員外郎王父誦

華州司法叅軍父澣少府監贈散騎常侍公卽右貂之
仲子也以門蔭補口文館學生試經高第授華州叅軍
次授鄭縣主簿調鄭縣尉辭疾就選授左金吾衛錄事
叅軍爲樓煩陳公所辟署監口口判官奏大理評事轉
大理司直兼殿中侍御史後使郭公邀畱殿中侍御史
遷監牧副使除河南倉曹叅軍秩滿調集天官除登封
縣令大和癸丑歲閏七月三日啟手足焉新唐書宰相
世系表博陵崔氏三房其祖父皆不見於史百官志散
騎常侍皆金蟬珥貂左散騎與侍中爲左貂右散騎與
中書令爲右貂殿中侍御史爲七品清官其餘河南倉
曹叅軍登封縣令皆降秩也

同州司兵叅軍杜行方墓誌銘

大和七年十一月

右同州司兵叅軍杜行方墓誌銘在長安縣誌稱曾祖
元志杭州刺史王父叅謨陝州司倉贈禮部郎中烈考
倫歷宸闈郎署而後出分符竹不言所歷之官唯稱公
卽澧州之長子新唐書宰相世系表杜氏元志考功郎
中杭州刺史叅謨陝州司倉叅軍倫水部郎中澧州刺
史俱與誌合誌前題姨弟尙書吏部侍郎鄭澣撰世系
表澣與元節度使新唐書有傳

修龍宮寺碑

大和九年四月

右修龍宮寺碑在嵯縣碑稱龍宮在剡靈芝鄉嵯亭里
嘉泰會稽志高似孫刻錄皆有靈芝鄉而無嵯亭里碑

爲浙東觀察使李紳撰稱貞元十八載余以進士客於江浙時適天台與修真會遇於剡之陽師顧謂余曰後當領鎮此道幸願建□龍宮以資福履大和癸丑歲余自分命洛陽承詔以檢校左騎省廉察於茲歲逾再□而修真已爲異物龍宮棟宇將盡命告墳塔云云新唐書李紳傳以太子賓客分司東郡大和中李德裕當國擢紳浙東觀察使所言皆與碑合天台集有李紳龍宮寺詩序云貞元十六年余以布衣東遊天台有僧修真爲余言異日爲修此寺文與此少異李紳傳元和初擢進士第貞元十八載不得稱進士當以詩序之言爲正詳見余所撰台州札記

龍興寺陀羅尼經幢

開成二年正月

右龍興寺陀羅尼經幢在仁和縣幢前題開成二年正月一日建處士胡季良書後又有大中五年八月廿四日梁乾化五年五月八日及宋明人重修題記宣和書譜胡季良不見於史冊惟工行草追慕古人而得其筆意

岳林寺造像記

開成三年七月

右岳林寺造像記在奉化縣岳林寺大殿佛像下文十五行行三字雕刻塑淨玉篇無塑字古作埭廣韻塑像也出周公夢書

□岳道士邢□等題名

開成五年六月

右口岳道士邢口等題名在錢唐縣吳山青衣洞文云
大唐開成五年六月十八日口口口口岳道士邢口錢
唐縣令錢華記道士諸口鑒元書凡七行八分書癸辛
雜識載此題名五年謄作元年岳上有南字邢下作令
聞二字每行五字邢下不得有聞字邢下非令字甚明
或作全或作全疑不能明也

河東節度使李光顏碑

開成五年八月

右河東節度使李光顏碑在榆次縣光顏爲光進之弟
李程撰此碑其文不及史傳之詳以其事已見於裴度
所撰墓誌也碑云鄆人不襲命口討叛遂有義成之拜
公以所統者許師所處者東郡疏陳利害遂復其舊焉

連下諸城而齊寇殲殄新唐書李光顏傳帝討李師道
徙義成節度使許以忠武兵自隨不三旬再敗賊濮陽
拔斗門斬數千級上言許鄭兵合不可用遂復鎮忠武
傳所言與碑合方鎮表貞元元年永平軍節度更號義
成軍增領許州三年置陳許節度使十年賜號忠武軍
其云齊寇殲殄者卽指李師道也

佛頂尊勝陀羅尼咒幢

會昌二年九月

右佛頂尊勝陀羅尼咒幢在吳縣洞庭包山幢前題佛
頂尊勝陀羅尼幢所書是咒金石萃編尼下添經字非
是幢末小字唐會昌二年壬戌九月八日寺僧文鑒等
同建沙門契元書

趙公夫人河內張氏墓誌銘

會昌三年五月

右趙公夫人河內張氏墓誌銘在長安縣誌云會昌三年歲次癸亥正月廿四日終於長安延壽坊之私第四男成長二子聘室二女有家長女幼適河內□□任定遠將軍前光王府典軍次女早適樂繁任濠州□□縣尉以其年五月廿六日窆於京兆府長安縣小嚴村之原新唐書諸子列傳玄宗子光王琬開元十三年封百官志親王府典軍二人正五品上長安志延壽坊在朱雀第三街之南小嚴村亦見韓寶才墓誌長安志不載

處士包公夫人墓誌銘

會昌三年十二月

右處士包公夫人墓誌銘在錢唐縣誌稱夫人姓張包

君前娶義陽朱夫人唐志無義陽縣當是其所舉郡望也奄終錢唐縣方興鄉之私第葬於履泰鄉之高原皆可補地志之闕

宣功叅軍魏邈夫人趙氏墓誌銘

會昌五年十一月

右宣功叅軍魏邈夫人趙氏墓誌銘魏邈墓誌銘已見前此乃與夫人趙氏合葬誌也前誌稱轉宣州司功叅軍今年復有詔令之本任以其年十月十三日終於宣州宣城縣之公館以明年歲次乙未四月八日己酉葬於京兆府萬年縣之畢原此誌稱以元和九年十三日不祿於任十年四月窆於萬年縣洪固鄉北韋村北原元和十年是歲次乙未當是其後所改葬也夫人趙氏

以會昌五年十一月附葬相距已卅一年

明州蓬萊觀碑

大中二年六月

右明州蓬萊觀碑在象山縣馮雲伯教授拓贈碑云肅
皇在上汝南袁仲宣守臨□□神龍之初縣肇名剏城
詔屬於台廣德二年爰移於明台守仲宣得□□□□
已七十年舊唐書地理志象山縣屬台州新唐書地理
志明州象山縣本隸台州神龍元年析寧及鄞置廣德
二年來屬皆與碑合赤城志郡守題名袁光孚天寶十
四載盡廣德二年此稱袁仲宣者當是其字又稱今上
登御之元年刺史隴西李公敬方天台集有李敬方喜
晴詩自注時左遷台州刺史當在其後

五大夫市新橋記 大中四年七月

右五大夫市新橋記在會稽縣記本刻在幢上凡六面
字多摩泐寶刻叢編五大夫市新橋記周援書會昌三
年月屬無射二十有九日建在會稽虞江之東嘉泰會
稽志作余球述周援行書石不存此拓本題匡廬山野
人余球述汝南周援書會稽志作周授誤也記末年月
已泐後有跋云□子建此幢至五年□月奉勅□寺其
幢隨倒大中卽位元年佛法□□四年庚午歲秋七月
九□□溧水尉劉皐與當闕□□同慕緣而再建置於
□□會稽志稱石不存僅知原石之毀而不知大中四
年之重建也

岳林寺塔記

大中五年

右岳林寺塔記在奉化縣岳林寺東塔內文凡八行前題僧君長述并書末云時大中五載再剏□□殿□□焉闕者唯塔傅氏發言云云此大中五年是言其剏殿之日非建此塔之年記又稱茲寺二塔皆女弟子傅氏二娘之建此東塔亦當與西塔同時並建在大中十年

賜白雲先生書詩并禁勅碑

大中八年四月

右賜白雲先生書詩并禁勅碑在濟源縣王屋山白雲先生者司馬子微也碑額題睿宗大聖皇帝開元神武皇帝賜白雲先生書詩并禁山勅碑寶刻叢編有此碑引集古錄目云唐賜白雲先生勅三玄宗勅并送別詩

各一陽臺宮畫壁奏狀并荅勅乾元元年禁山廟採樵
勅三大中八年王屋主簿韓抗書以刻石碑字多摩滅
大略如錄目所言末大中八年四月字猶可辨

岳林寺塔銘

大中十年正月

右岳林寺塔銘在奉化縣岳林寺西塔佛像下文凡二
十五行多剝蝕不可辨銘詞後刻捨錢姓名文云前睦
州清溪縣尉張□捨□文元和郡縣志睦州清溪縣黃
武元年分歙縣東鄉置元豐九域志作青溪兩浙金石
志誤連下條釋作明州非是

法隆寺陀羅尼經幢

大中十一年十一月

右法隆寺陀羅尼經幢在金華縣南法隆寺俗稱金錢

寺幢高四尺餘凡八面末題大中十一年十一月十五日樹刺史李蟻錄事叅軍衛約金華縣令余師周于知仁書等銜名華嶽廟有咸通元年十二月廿九日左諫議大夫賜緋魚袋李蟻祈雪題名

候官縣丞湯華墓誌銘 大中十二年十一月

右候官縣丞湯華墓誌銘在鄧縣誌稱君釋褐衡州叅軍再調授福州候官丞秩滿寓居南方以大中十一年六月五日終於嶺中連江邑之客第以大中十二年十一月廿八日歸葬於明州鄧縣龍山鄉江上里庚向之原古人以千支紀方位漢書禮樂志武帝祠大乙於甘泉就乾位也五經異義引泊于登說明堂在國之陽丙

已之地水經河水注引十洲記崑崙山在西海之戌地北海之亥地然用以紀向或卽今堪輿家羅經之術新唐書地理志連江縣屬福州嶺中當指其毗連之嶺兩浙金石志以嶺中卽嶺南非是

安隱寺陀羅尼經幢

大中十四年正月

右安隱寺陀羅尼經幢在仁和縣臨平鎮幢凡八面唯下層第一面刻唐大中建幢年月人名餘七面本刻捨錢人題名後磨去刻宋天禧紹興重修題記幢首行唐大中□□□□庚辰□月廿七日建字尙可辨據天禧題記稱此幢始自鉅唐大中十四年歲次庚辰正月二十七日新唐書本紀懿宗以大中十三年八月卽位

至次年十一月改元咸通故此正月稱大中十四年

福田寺三門記

咸通三年九月

右福田寺三門記在雩都縣同邑宋心芝廣文以拓本見示碑前題唐虔州雩都縣福田寺三門記王象之輿地碑目贛州有福田院碑在雩都縣唐咸通中進士楊知新重修寺記與此碑題少異元和郡縣志虔州武德五年置雩都縣屬虔州元豐九域志歐陽忞輿地廣記皆同宋史地理志紹興二十二年改虔州爲贛州雩都縣屬焉

幽州押衙王公夫人張氏墓誌銘

咸通四年七月

右幽州押衙王公夫人張氏墓誌銘在大興縣劉吉甫

太守所贈誌稱夫人姓自軒轅之弟子揮始造安寶張
羅網世掌中其職遂爲氏焉元和姓纂黃帝第五子青
陽生揮爲弓正觀弧星始制弓矢因姓張氏與此少異
夫人有子四人長曰弘泰見任雄武軍平地柵巡檢烽
鋪大將游擊將軍試左驍衛將軍文武全材君親選寄
弓開落雁詞逸橫科合附誌稱長曰弘太攝薊州三河
縣丞是舉其文職此乃舉其武職也新唐書地理志薊
州有雄武軍誌卽弘泰所書

加句佛頂陀羅尼經幢

咸通十年五月

右加句佛頂陀羅尼經幢在鄆縣阿育王寺經咒後有
題識云佛頂尊勝陀羅尼經開元廿六年冬有張繹長

史抄錄一本長慶元年四月奉天縣尉馬敷秩滿移歸
蒲坂寺僧義蔭蓄此本歸勘波利本方知文句脫略便
依修行新本以傳同志云云末有刺史柳縣令裴下莊
鎮使押衙程稔鎮副使衙前總管何郊等題名新唐書
百官志每鎮又有使一人副使一人凡軍鎮五百人有
押官一人千人有子總管一人

幽州押衙王晟夫人張氏合祔墓誌銘

咸通十一年八月

右幽州押衙王晟夫人張氏合祔墓誌銘夫人張氏墓
誌已見上誌稱公諱公晟字嗣復誌前結銜稱故幽州
隨使節度押衙正議大夫檢校國子祭酒兼侍御史上
柱國以咸通十一年庚寅歲夏六月二日屬纊於薊縣

軍都坊之私第以八月四日成事於幽都縣保大鄉樊村里之高原夫人張氏祔焉子四人長曰弘太其時已歿次曰弘雅補充節度駟使官次曰弘楚補充節度衙前散虞候皆前誌所未及

佛頂陀羅尼經幢

咸通十三年五月

右佛頂陀羅尼經幢不知所在上截陀羅尼經已摩滅下截有任期信張福智陳永泰等題名末題此幢本在□□寺自武宗毀廢委之榛蕪會此□□移來建立時咸通十三年五月二十三日縣令曹裕□下尙有缺字

戒珠寺陀羅尼經幢

咸通十三年八月

右戒珠寺陀羅尼經幢在紹興府戒珠寺今移葺山書

院幢凡六面字多殘泐幢末年月題識俱摩滅唯有先考故江陵府江陵縣等字可辨嘉泰會稽志王錡書尊勝經咸通十三年八月間人銖造在戒珠寺金石萃編以爲卽此幢

淨土寺毘沙門天王碑

中和二年正月

右淨土寺毘沙門天王碑在鞏縣碑字多殘泐碑稱時經亂離此寺獨無纖芥之患北方有神曰毘沙門得度于闐身乃國王神功莫測右執金槍左持寶塔寺僧敬塑其像於三門之左太白陰經有祭沙門毘天王文序云毘沙門神本西域法佛說四天王則北方天王也于闐城有廟身披金甲右手持戟左手擎塔祇從羣神殊

形異狀軍出而祭之至今州府多立天王廟焉所言正與碑合

福建觀察使陳巖墓誌銘

景福二年八月

右福建觀察使陳巖墓誌銘在閩縣馮雲伯太史曾修福建通志以拓本贈予新唐書王潮傳初黃巢將竊有福州王師不能下建人陳巖率衆拔之又逐觀察使鄭鑑自領州詔卽授刺史久之巖卒其壻范暉擁兵自稱留後潮攻福州彌年不下通鑑綱目中和四年十二月以陳巖爲福建觀察使初黃巢轉掠福建建州人陳巖衆數千保鄉里號九龍軍觀察使鄭鑑表以自代誌字多摩滅其稱鑑夙慕英風累資口畫請爲都團練副

使仍刺福建又三發疏章請代口口滎陽公尋告疾北歸足訂新唐書逐鄭鑑之誤誌稱府君以大順三年正月二十九日薨通鑑綱目嚴卒在大順二年十二月亦誤有子六人長曰延晦太子司議次延美守閩縣尉台州刺史杜雄墓誌銘女四次許嫁陳氏卽閩帥司空公第二子卽延美也誌題前鄉貢進士黃璞撰安定胡兆祉書

杜鵬花倡和詩

乾寧元年三月

右杜鵬花倡和詩在臨桂縣何夢華上舍所贈碑字摩滅不可辨寶刻叢編有此碑云杜鵬花詩二首唐張洎及嶺南節度使劉崇龜唱和詩前監察御史張巖書乾

寧元年刻諦視之大略如所言所云廣州僕射劉公者
卽崇龜也舊唐書劉崇龜傳大順中遷左散騎常侍改
戶部侍郎檢校戶部尚書出爲廣州刺史清海軍節度
嶺南東道觀察處置等使卒張溶傳大順元年十月溶
軍潰敗檢校戶部尚書武昌軍節度觀察等使尋貶連
州刺史新唐書三貶繡州司戶叅軍正與崇龜同時

梁府君墓誌銘

天祐十年十月

右梁府君墓誌銘在易州誌稱曾祖諱希幹皇祖諱甫
平皇考諱重立皇考卽府君誌當是其子所作而不書
撰名蓋俚儒所爲也嗣子三人孟曰思景高陽軍押衙
充孔目官新唐書地理志易州有高陽軍

王夫人殘墓誌 無年月

右王夫人殘墓誌在吳縣太平寰宇記虎邱山在吳縣西北九里誌云西北七里武丘山是避唐諱所改誌蓋唐人作也長子珣或以爲晉司徒王珣之母則謬矣

長明燈幢 無年月

右長明燈幢幢高一尺三寸而僅得其三面前有長明燈臺四字

後梁

明州押衙王彥回墓誌銘 乾化五年閏二月

右明州押衙王彥回墓誌銘在鎮海縣誌稱府君諱彥回字仲顏其曾祖祖父暨彥回皆無官職唯誌前結銜

稱梁故明州軍事押衙充勾押官銀青光祿大夫檢校
太子賓客兼殿中侍御史王府君新唐書百官志州刺
史有錄事叅軍事諸曹叅軍事領使則置副使推官衙
官州衙推軍衙推押衙卽衙推容齋續筆稱唐自肅代
以後賞人以官爵久而浸濫下至州吏部胥軍班校伍
一命便帶銀青光祿大夫此稱檢校太子賓客兼殿中
侍御史是虛銜非實職其稱軍事押衙卽軍衙推也

後唐

化度禪院陁羅尼經幢

長興四年三月

右化度禪院陁羅尼經幢在蕭山縣西興鎮吳越備史
乾化二年八月城西陵嘉泰會稽志西陵城在蕭山縣

西十二里初武肅王既都錢唐僭名西都以爲西陵非
吉語遂改名西興幢末有文穆王錢元瓘記武肅王以
長興三年三月二十八日薨其年文穆尙未終制吳越
備史長興四年三月勅遣引進使楊彥珣授王起復故
此幢末結銜有起復二字

後晉

高明寺陁羅尼幢

天福二年七月

右高明寺陁羅尼幢在天台縣末題清信弟子孫紹榮
因小男楊三疾患遂捨淨財奉爲亡考十五郎口造陁
羅尼幢口口所捨入天台幽溪禪院永充供養時天福
二年歲次丁酉七月辛亥朔十五日乙丑記幽溪禪院

卽今高明寺兩浙金石志載此幢道光壬辰九月余游天台山親至高明寺訪此幢其石已毀茲從舊拓本錄之

瑞像保安禪院記

大福九年七月

右瑞像保安禪院記在錢唐縣石屋洞碑字多殘泐記稱長老勝公禪德口口檀越口願發菩提捨淨財伍伯阡口口口不踰年而口口口工畢聞於吳越國王殿下賜院額名石屋瑞像保安禪院云云末題大晉天福九年七月辛未朔十七日丁亥記據五代史晉天福止八年出帝紀開運元年秋七月辛未朔大赦改元此稱天福九年時赦書尙未到也西湖石屋洞造像題名最多

自晉天福至宋乾德兩浙金石志載四十四種近六舟上人又搜得至百餘種其拓本全冊歸於予因繁細碎不能悉載附記於此

南漢

邵廷珪造石塔記

大寶五年

右邵廷珪造石塔記在東莞縣資福寺塔五層四面龕室裝嚴佛像鐫造佛頂尊勝陀羅尼經蓋因羣象踏食百姓田禾累奉勅下差人採捕驅括入欄烹宰當時作此石塔以鎮之大寶下年月已泐邵廷珪銜名亦殘闕廣州先賢傳稱是大寶七年粵東金石略作大寶五年今諦視大寶下五字尙可辨

吳越

開慈雲嶺記

題甲申歲

右開慈雲嶺記在錢唐縣慈雲嶺石壁篆書寶刻叢編有此記蓋興建龍山在梁貞明五年開嶺建西關城宇在唐同光二年吳越備史皆不載末題甲申歲六月十五日吳越國王記海會寺有吳越經幢題時寶大元年歲次甲申五月一日則此甲申歲是寶太元年當唐同光之二年也

風山靈德王廟碑

寶正六年七月

右風山靈德王廟碑在武康縣碑云丙戌年春寡人以玉冊葬膺於典禮清宮未展於巖煙遂輟萬機暫歸錦

里尉屬節當炎暑猶未卻迴都城吳越備史丙戌夏四月戊寅王不康如衣錦軍命文穆王監國秋七月庚寅王至白衣錦軍所言皆與碑合武肅王以甲申歲改元寶大丙戌歲改元寶正辛卯歲是寶正六年碑中寶正及都城寡人等字皆錢似納土後所鑿

天竺寺陀羅尼經幢 乙未歲十二月

有天竺寺陀羅尼經幢在錢唐縣幢凡二所經文及記年月皆同文稱佛弟子吳寶容吳鐔雙驥標奇二龍並舉遍募信人獲錢三十萬購之貞石命彼良工募卽募字前題光文大德賜紫沙門葉征撰寶刻叢編台州碑目有漢重修法空大師塔亭碑臣葉征奉制撰記末題

乙未歲是文穆王元瓘嗣位之三年當後唐廢帝清泰
之二年也

讀碑記三續卷下終